

**AWIG-AWIG  
DESA ADAT BUITAN**



**KEDESAAN MANGGIS  
KECAMATAN MANGGIS  
KABUPATEN KARANGASEM**



## MURDHA WAKYA

Om Swastyastu

Purwa pangastungkaran tityang Krama Desa Adat Buitan, ring buk padan Ida Sang Hyang Widhi maka sangkan paraning dumadi, Bhatara-bhatari sane malinga ring Pura KahyanganTiga Desa Adat Buitan, minakadi Pura kahyangan sami sane wenten sajroning wawengkon Desa Adat Buitan, dwaning malarapan saking kerta wara nugrahan paduka Bhatara Samudhaya, karya puniki kasidha puput.

Kaping kalih hatur pangayubagyan tityang krama Desa Adat Buitan, pingajeng ring ida dane para Panglingsir, Klihang, Pamangku, minakadi ida dane sang maraga cestakara, widagdha pradnyan wicaksana sareng sami, sane sampun sangkaning sueca ledang sareng mapawangun ngripta uger-uger marupa Awig-awig Desa Adat Buitan puniki, pacang kanggen sepat siku-siku sajeroning desa kantos kaungkur wekas.

Taler majeng ring Pamerintah Daerah Kabupaten Karangasem, para Manggala MDA Kabupaten Karangasem, Manggala MDA Kecamatan Manggis sane mastika ngiwang patutang awig-awig, tityang ngaturang pangayu bagia, duaning sampun kasidhan nureksa maritetes saha mastika kantos marupa puput.

Mungwing daging ipun manut Tri Hita Karana, indik kahyangan genah ngadisthana Ida Sang Hyang Parama Wisesa. Indik pawongan pinaka krama Desa, indik palemahan pinaka wawidhangan wawengkon desa, mabantang antuk lekita sastra-gama, sasana, pasuara, dresta, minakadi sane siosan, sane anut ring pamargin dharma agama kalih dharma nagara. dumadak kasidhan mamanguhang kajagadhitan sakala niskala.

Om Santih Santih Santih Om.

**NIYASA**



**ARTOS LOGO**

<i>No.</i>	<i>Gambar</i>	<i>Artos</i>
1.	Sinar Ongkara	Sinar Suci Agama Hindu
2.	Padi Lan Kapas	Gemuh Landuh Sandang lan Pangan
3.	Candi	Lingih sane kasuciang, Nyangra Umat
4.	Rante	Paiketan Krama Desa lan dresta tami katami musti tetep kawerdiang.
5.	Gunung	Desa Adat Buitan wentene ring Wawidangan Karangasem
6.	Desa Adat Buitan	Wastan Desa Adat
7.	Segi Lima	Madasar antuk Pancasila

## KATATTWAN DESA ADAT BUITAN

Manut saking pangandikan para pangelingsir Desa Adat Buitan sane naan dados Bendesa lan para pangelingsir sane lianan, Buitan punika kabawos mawit saking kruna "bui" lan "tahanan". Kruna "bui" mateses genah ngemargiang pamidanda, Kruna "tahanan" mateses para jana sane ngemarginin pamidanda. Kruna "buitahanan" mateses genah para janane sane melaksana nenten patut raris ngemarginin pamidanda. Kasuen-suen kruna **buitahanan** dados **buitan**.

Santukan ring genah puniki olih Raja Karangasem duk punika naanin kaanggen pinaka genah midanda para jana sane maparilaksana nenten patut, minekadi memaling, memandung, mapisuna, ngemademang, taler para jana sane madwe utawi ngemargiang aji ugig.

Ring genah puniki duk riin wiyakti kantung sepi tur marupa alas madurgama pisan, mawinan dahat becik kaanggen genah midanda para jana punika. Para jana sane kapidanda ring genah punika rauh saking makudang-kudang desa/wawengkon. Kawentenan para janane punika tetep kaawasin lan kaicen pawarah-warrah olih Raja Karangasem mangdane ipun prasida mawali dados jadma sane patut lan becik. Genah Ida Raja Karangasem matinjo/ngawasin para jana sane kapidanda, ngantos mangkin kantung, mawasta Taman (genah Hotel Alila mangkin). Dwaning dados genah tahanan saking makudang-kudang desa, kasuen-suen makeh para janane magenah iriki.

Ring sisi kelod genah puniki wantah segara sane becik, makeh jukung perahu, janggolan taler kapal sane nyandar tur mulang jangkar, mawinan genah puniki kawastanin pabean inggih ipun genah para bendega ngeraryanang jukung lan perahu. Mawinan makeh para bendega rauh kagenah puniki, gumanti jaga ngawentenang patemon tur nukarang adol-adolan (barter) ring pabean.

Yan akuda minab makeh janane sane rauh tur kudang tahun suene sampun magenah iriki, kantos ipun rumasa demen, raris ipun magenah jumenek ring genahe puniki tur nguwangun paiketan sukaduka sane kawastanin “Pancingan”. Genah puniki kawastanin Pancingan riantukan kawigunayang pinaka genah ngarereh pangupa jiwa sekadi bendega utawi tukang pancing. Sangkaning punika, kantos mangkin genahe punika kawastanin Banjar Pancingan.

Sawatara ring caka 1650, warga Banjar Pancingan manggihin pikobet sane tan prasida katandakin. Irika raris krama Banjar Pancingan tangkil ring Ida Raja Karangasem, mapinunas mangda kaicen pasayuban, santukan sami harta branan ipun telas kajarah antuk jadma corah. Raja Karangasem nitahang mangda krama saking Desa Pekarangan tedun ke Banjar Pancingan nandakin pikobet punika. Wenten petang Dadia akeh nyane krama sane nyarengin lwire: Krama Dadia Dulu, Krama Dadia Kauh, Krama Dadia Tengah lan Krama Dadia Penyarikan. Sapengerauh krama saking Desa Pekarangan kasambra becik olih krama Banjar Pancingan, santukan rumasa polih pasayuban.

Krama saking Desa Pekarangan ngerereh genah ring sisi kaler Banjar Pancingan, taler mapupul ngaryanin paiketan pasukadukaan. Kawitne genah paiketan pasukadukaan punika kawastanin Banjar Timbul, santukan akeh wit timbul irika. Kaswen-swen wasthan Banjar Timbul kagentosin, mangda wenten pinaka cihna pangeling-eling, santukan genah punika polih kaanggen midanda para jana sane nenten patut/ “**buitahanan**”. Raris krama ring Banjar Timbul sumuyub ngentosin wasthan Banjar Timbul dados Banjar Buitan ngantos mangkin.

Saantukan Banjar Buitan wenten ring wawengkon sane kalintangin saking wawengkon Raja Karangasem sareng wawengkon Raja Klungkung, punika mawinan Banjar Buitan seringan dados genah pesandekan/pasimpangan, tur wenten kantos jenek magenah ring Banjar Buitan sekadi wargi saking Pasedahan, saking Kuum Kecamatan


Abang lan saking Bale Punduk Kecamatan Karangasem. Kasuen-suen krama Banjar Buitan sayan ngakehang turmaning sami rumasa seneng nyaman ring genahe iriki, raris metu paiguman pakayunan pacang ngawangun Pura Kayangan Tiga pinaka linggih Ida Sanghyang Widhi mangda prasida ngamolihang karahayuan. Lan sepatutne pinaka manusa mangda prasida ngawetuang kaharmonisan, inggih punika Tri Hita Karana : harmonis manusa ring Sanghyang Widhi, harmonis sareng manusa siosan, harmonis sareng lingkungan .

Ri sampun prasida ngawangun Pura Kahyangan Tiga, Banjar Buitan sampun prasida pinaka Desa Adat. Desa Adat sane sampun kacumawis mawasta Desa Adat Buitan. Wastan Desa Adat Buitan puniki kawedar saking sejarah sane metu ring wawengkon puniki.

Desa Adat Buitan karentebin antuk kalih Banjar Adat inggih punika: Banjar Adat Buitan lan Banjar Adat Pancingan. Banjar Adat Buitan pinaka Pangrajeg Desa Adat Buitan, Banjar Adat Pancingan pinaka pangremba Desa Adat Buitan.

Asapunika katattwan Desa Adat Buitan, mangda kaanggen pikukuh ring krama Desa Adat Buitan salantur nyane.

**WAWIDANGAN DESA ADAT BUITAN**





DAGING AWIG-AWIG  
DESA ADAT BUITAN

MURDHA WAKYA .....	i
NIYASA .....	ii
KATATTWAN DESA .....	iii
WAWIDANGAN DESA .....	Vi
DAGING AWIG-AWIG .....	vii
PRATHAMAS SARGAH : ARAN LAN WAWIDANGAN DESA .....	1
DWITYAS SARGAH : PIKUKUH MIWAH PATITIS TATUJON .....	1
TRITYAS SARGAH : SUKERTA TATA PAKRAMAN .....	2
Palet 1 : Indik Krama .....	2
Palet 2 : Indik Tata Praja Desa Adat.....	6
Palet 3 : Indik Sangkepan lan Paruman .....	9
Palet 4 : Indik Kulkul .....	11
Palet 5 : Indik Druen Desa .....	12
Palet 6 : Indik Laluputan .....	13
Palet 7 : Indik Dadosan Patedunan .....	14
Palet 8 : Indik Bhaya .....	14
Palet 9 : Indik Rarampagan lan Kekeran Desa .....	15
Palet 10 : Indik Panyanggran Banjar, Krama Desa .....	15
CATURTAS SARGAH : SUKERTA TATA AGAMA .....	15
Palet 1 : Indik Dewa Yadnya .....	15
Kaping 1 : Indik Kahyangan .....	15
Kaping 2 : Indik Pangaci-aci .....	16
Kaping 3 : Indik Pamangku .....	18
Kaping 4 : Indik Sukerta Pura Kahyangan .....	19
Kaping 5 : Indik Cuntaka, miwah Sosot .....	21
Palet 2 : Indik Resi Yadnya .....	24
Palet 3 : Indik Pitra Yadnya .....	25
Palet 4 : Indik Manusa Yadnya .....	27
Palet 5 : Indik Bhuta Yadnya .....	28

---

PANCAMAS SARGAH : SUKERTA TATA PALEMAHAN .....	29
Palet 1 : Indik Tegal, Bangket lan Karang .....	29
Palet 2 : Indik Kakayonan .....	31
Palet 3 : Indik Wawangunan .....	32
Palet 4 : Indik Wawalungan .....	34
SAT SARGAH : SUKERTA TATA PAWONGAN .....	36
Palet 1 : Indik Rangkat .....	36
Palet 2 : Indik Palas Makurenan utawi Nyapian .....	37
Palet 3 : Indik Balu .....	38
Palet 4 : Indik Santana .....	38
Palet 5 : Indik Wawarisan .....	39
SAPTAMAS SARGAH : WICARA LAN PAMIDANDA .....	40
Palet 1 : Indik Wicara .....	40
Palet 2 : Indik Pamidanda .....	40
ASTAMAS SARGAH : NGUWAH-NGUWUHIN AWIG-AWIG .....	41
NAWAMAS SARGAH : PAMUPUT .....	42

## **PRATAMAS SARGAH**

### **ARAN LAN WAWIDANGAN DESA**

#### **Pawos 1**

1. Desa puniki mawasta "Desa Adat Buitan", salantur ipun kinucap, kalih kasuratang ri sajroning lekita "Desa Adat Buitan".
2. Wawidangan Desa Adat Buitan mawaneng nyatur desa, manut sakadi kinucap ring sor puniki :
  - ha. Tepi siring wetan utawi Kangin : Tepi kauh Desa Adat Sengkidu
  - na. Tepi siring kidul utawi Kelod : Segara
  - ca. Tepi siring kulon utawi Kawuh : Tepi kangin Desa Adat Manggis
  - ra. Tepi siring lor utawi Kaler : Tepi kelod Desa Adat Apityeh
3. Sajroning wawengkon Desa Adat Buitan, wenten bebanjaraan miwah kampung muslim, lwire :
  - ha. Banjar Adat Buitan
  - na. Banjar Adat Pancingan
  - ca. Kampung Muslim Buitan

## **DWITYAS SARGAH**

### **PIKUKUH LAN PATITIS TATUJON**

#### **Pawos 2**

Maka pikukuh, Desa Adat Buitan, ngrajegang, mikukuhin, kalih mitindihin pisan :

1. Pancasila
2. Undang-Undang Dasar 1945
3. Tri Hita Karana

#### **Pawos 3**

Desa Adat Buitan ngamanggehang patitis tatujon, lwir ipun :

1. Ngutamayang tata cara maagama Hindu
2. Ngawangunang, katreptian sajroning desa Adat, mangda kasidhan rajeg katreptyaning praja sadaya

3. Ngawrediyang kawicaksanan minakadi kaprajnanan maka larapan gumawe gemuh landuhing praja
4. Ngamanggehang kalih ngawrediyang dreweyaning desa, majalaran kawicaksanan guna laksana manut dharma prawreti
5. Ngarajegang dharma agama miwah dharma nagara.

**TRITYAS SARGAH**  
**SUKERTA TATA PAKRAMAN**  
**Palet 1**  
**Indik Krama**  
**Pawos 4**

1. Sane kasinanggeh Krama Desa Adat Buitan, lwire :
  - ha. Sang sapisira ugi jenek magenah ring wawengkon Desa Adat Buitan lintang ring tigang sasih utawi 105 dina, sane rajeg maagama Hindu.
  - na. Sang sapisira ugi wed saking desa Adat Buitan, jenek magenah ring dura desa luaring Desa Buitan, nanging kantun mipil ring sinalih tunggil banjar Adat sane wenten ring sajroning Desa Adat Buitan, sane mula pagenahanya nguni.
2. Papalihan Krama, kadi ring sor puniki :
  - ha. Krama Purwa inggih punika: krama desa sane bulangkep, sane sampun mipil saking nguni ring Banjar Adat Buitan, utawi mipil ring Desa Adat Buitan, saha maayahan saurah-arih kadi patute.
  - na. Krama Gumi inggih punika: krama desa sane bulangkep, sane magenah utawi wawu magenah tur wawu mipil ring sinalih tunggil banjar Adat sane wenten ring sajroning Desa Adat Buitan, tan mayahan saurah-arih.
  - ca. Krama Kakuhuban utawi Sorpa, inggih punika, karma desa sane durung merabian, sakadi deha teruna, truna tuwa, deha tuwa, sane kantun kakuhub antuk krama ngarep.
  - ra. Krama Nyada inggih punika krama desa sane sampun tan keni ayahan, lwire :
    - 1). Sangkaning mapinunas ngaraga, saha polih palugrahan Prajuru Desa Adat Buitan.
    - 2). Sangkaning kasundul.

*Awig-awig Desa Adat Buitan,*

---

- 3). Sasampun tan mresiddhayang mayahan, mayusa lintang ring 70 tiban, manut panglokikan Prajuru Desa Adat Buitan
  - 4). Mabukti sungkan rahat tan sidha waras, manut panglokikan Prajuru Desa Adat Buitan
- ka. Krama Balu inggih puniki krama desa lanang wiyadin istri, sane katinggal seda utawi nyapian antuk rabinya. Wenten balu camput, wenten balu masentana.
- da. Krama nglaga inggih punika sang sapisira ugi wed saking Desa Adat Buitan, jenek magenah ring dura desa, nanging manggeh mipil ring sinalih tunggil banjar utawi ring desa.
- ta. Krama Sesabu inggih punika krama wit saking lwaring desa, jumenek magenah saha makarang paumahan ring wawengkon Desa Adat Buitan.
- sa. Krama tamiu, inggih punika krama sane kinucap kadi ring sor puniki :
- 1). Sang sapisira ugi saking luaring Desa Adat Buitan, jenek magenah ring wawengkon Desa Adat Buitan, tan ngawengku karang pomahan, madedunung ring pomahaning krama desa, magenah ring pomahan druwen guru wisesa, hotel miwah saluwir ipun, lintang ring tigang sasih utawi 105 dina.
  - 2). Sang sapisira ugi wed saking luaring Desa Adat Buitan makakubon ngenahin palemahan tegal, carik, palasan, ring wawengkon Desa Adat Buitan, nanging kari manggeh makrama desa ring kamulan desanya, kabuktियang antuk ilikite sasinahan saking Keliyang desanya
- wa. Tamiu inggih punika: sang sapisira ugi jenek magenah ring Desa Adat Buitan, tan maagama Hindu, tan sareng saparikramaning Agama Hindu, nanging tan piwal ring Awig-Awig miwah Pararem Desa sane ngindikang tata pawongan kalih tata palemahan;
- la. Tamiu ngajag inggih punika: Sang sapisira ugi rauh ka jeroning Desa Adat Buitan, nanging tan nekeh magenah irika, kasinanggeh tamiu ngajag, sang karauhan tamiu patut matur supeksa ring Prajuru Desa, yan tan asapunika, Prajuru Desa wenang nundung tamiu inucap mangda matinggal saking desa.

### **Pawos 5**

Ngawit tedun makrama desa, ring Desa Adat Buitan:

1. Krama sane mawed saking Desa Adat Buitan, malarapan antuk tateragan luire sampun bulangkep lintang ring tigang sasih utawi 105 dina saking dina rangkate .
2. Krama desa wed saking Desa Adat Buitan, matinggal ka dura desa, miwah usan makrama desa, wastu malih mawali ka Desa Adat Buitan :
  - ha. Yan sangkaning rahayu kalih saking palugrahan prajuru Desa patinggale nguni, wenang mawali mipil ring banjar Adat sinalih tunggil sane wenten sajroning Desa Adat Buitan, nganutin sukretan banjar Adat punika sowang-sowang
  - na. Yan sangkaning tan rahayu patinggale nguni, yogya Kliyang Banjar sane katuju ngatengahang babawose ka desa, manggda kabawosin antuk prajuru desa, yan katinutin tatepasan prajuru desa punika, tur kacihnayang antuk maguru piduka ring Pura Puseh Buitan, prasiddha kalugra mipil pinaka Karma Gumi Desa Adat Buitan, saha keni pengetang manut pararem.
3. Yan wenten krama luaring Desa Adat Buitan ngeranjing makrama desa, ugi Klihang Banjar sane katuju ngatengahang bebaose ke desa, mangda kabaosin antuk prajuru desa. Yan sampun polih palugrahan saking prajuru desa, sang jagi makrama kapipil ring Krama Gumi Desa Adat Buitan, saha keni pengetang manut pararem.

### **. Pawos 6**

Usan makrama desa ring Desa Adat Buitan, malarapan antuk :

1. Seda
2. Sangkaning pinunas ngaraga, saha polih palugrahan Prajuru Desa Adat Buitan
3. Tedah utawi tilar saking Agama Hindu.
4. Kasepekang antuk Desa
5. Kanorayang antuk Desa

**Pawos 7**

1. Swadharmaning krama desa :

- ha. Krama purwa yogya ngamucukin karya, keni payah-ayahan, tata turun cumek, nyanggra saraja karyan desa, manut hunggwan sowang-sowang
- na. Krama gumi yogya ngarembo saraja karya sane kapucukin antuk krama desa purwa.
- ca. Krama kakuhuban, yogya nyanggra saraja karya ritatkala aci, sane katiwakang antuk desa manut dresta;
- ra. Krama balu lanang wiyadin istri, tan keni tata turun utawi lese. Yan balu punika ngamong karang desa keni panigasanan satunggil aci Usabha Puseh, gung artha manut pararem. Kawekas yan okane lanang wiyadin istri sampun hantes mayahan, patut krama balu punika mayahan matata turun cumek, bulangkep antuk piyanak
- ka. Krama Nglaga, tan keni ayah-ayahan miwah lan-lanan, nanging yogya nawur pasabuhan ka desa satunggil aci Usabha Puseh, manut pararem.
- da. Krama sasabu yogya ngarembo saraja karya sane kapucukin antuk krama purwa, yan wenten pabuwat saking desa, kahunadikayang antuk Prajuru Desa, nawur pasabuhan ka desa satunggil aci Usabha Puseh, gung artha manut pararem
- ta. Krama Sesabu sane ngenahin karang paumahan desa, keni panigasanan ngamasa-masa, satunggil aci Usabha Puseh, gung artha manut pararem
- sa. Krama tamiu, wenang keni pasabu ka desa manut pararem:
- wa. Krama sane tan maagama Hindu, tan sareng sapolikramaning desa, nanging tan wenang piwal ring awig-awig, paswaran desa, miwah pamutus pararem desa, sane ngindikang tata pawongan kalih palemahan.
- la. Krama desa samiyan yogya saturut ring daging Awig-awig Desa Adat Buitan, paswara miwah pamutus pararem Desa, ngutsahayang mangda kasiddhan mapikolih sakadi patitis tatujon desane kinucap ring hayun, tumus mamangguhang kajagaddhitaning praja.

2. Phala-peksaning krama desa :
  - ha. Krama purwa wenang polih babagian layuban aci-aci salwiripun, twas-twasan, miwah sawosan sane patut.
  - na. Krama desa samiyan yogya polih pasayuban wiyadin pangoban saking Desa, salwiring wyawaharanya yogya kabawosan antuk Prajuru Desa manut tata titining wyawahara.
  - ca. Krama desa samiyan sane maagama Hindu wenang ngalaksanayang Panca Yadnya, sajroning Desa Adat Buitan, manut desa kala patra, sastra agama, miwah nganutin siman desa hinucap.
  - ra. Mapawanged, nyaluk, tan tedun maayahan, yogya saking panglokikan kalih palugrahan Prajuru Desa

## **Palet 2**

### **Indik Tata Praja Desa Adat**

#### **Pawos 8**

1. Prajuru Desa Adat Buitan , luire:
  - ha. Bendesa
  - na. Petajuh Bendesa
  - ca. Panyarikan
  - ra. Juru Raksa
2. Sabha Desa Adat Buitan, luire
  - ha. Manggala sapisanan Angga
  - na. Penyarikan sapisanan Angga
  - ca. Angga
3. Kertha Desa Adat Buitan, luire
  - ha. Manggala sapisanan Angga
  - na. Penyarikan sapisanan Angga
  - ca. Angga



**Pawos 9**

1. Ngadegang Prajuru Desa.

Sane wenang kahadegang wiyadin kamanggehang dados Prajuru Desa Adat Buitan lwire :

ha. Krama Purwa ;

na. Tan cedangga, sakadi peceng, perot, cungh, lan sapanunggilan ipun sane katandangin utawi kabakta saking wahu hembas ;

ca. Wikan mamawos kalih nyurat aksara Bali utawi Latin :

ra. Mabukti tan nahen malaksana corah

2. Pidabdab ngadegang Prajuru Desa :

ha. Kekawitin antuk ngadegang prajuru panilihan (Panitia), selanturnya prajuru panilihan ngawentenang dudonan saseliran panilihan Pangadegan Bendesa, Petajuh Bendesa, Panyarikan lan Juru Raksa. Kaanutang ring pararem ngadegang Bendesa.

na. Lamine madeg dados prajuru desa, wantah limang warsa ngawit saking dina pawintenane, sejaba kapadgatakalan.

ca. Yan sampun nahen madeg pinaka prajuru desa, dados kasudi malih sajroning paruman Desa.

ra. Yan wenten sinalih tunggil piwal kalaning kasudi antuk Paruman desa sang piwal punika wenang katiwakin panglokika. Yan jati tuhu paksanya, Paruman desa wenang nyudi sane sewosan

**Pawos 10**

Swadharmaning Prajuru Desa :

1. Midabdabin desa, krama desa, pacang ngupadi kajagaddhitan sakala niskala, maka darsana Awig-awig desa, paswaran desa, pamutus pararem desa, nganutin sastra agama Hindu minakadi uger-uger Nagara.

2. Ngarancanayang salwiring sane nyandang pacang wangunang, sane patut hayum,manut lokika desa kala patra. Sane mabuwat, mangda kasiddhan polih palugrahan guru wisesa.

3. Mamawosin salwiring wicara sane wetu sajroning Desa Adat Buitan, niwakang tatimbang, utawi pamutus babawos sane yogya kaputusan, sajroning desa Adat.

### *Awig-awig Desa Adat Buitan.*

---

Yan tan kasiddhan kabawosan ring desa, prajuru desa mituduhang mangda ngaturang ring guru wisesa mangda kabawosan.

4. Mratyaksayang, nulingayang saparipolah prajuru desa, lwire : Klihang Banjar Adat, Klihang Subak, klihang Dadia miwah klihang-klihang sewoosan, Pamanguku Desa, Puseh, miwah Dalem, minakadi sane sewosan sane wenten sasajroning wawengkon Desa Adat Buitan
5. Midabdabin salwiring pamargin aci-aci ring Desa Adat Buitan, taler nulingayang krama desa indike ngalaksanayang Panca yadnya
6. Prajuru desa wenang nyanggra salwiring pituduh, minakadi saraja karya saking guru wisesa, werat utawi ringan, sane yogya katiwak ring Desa Adat
7. Nyanggra saraja karya ri tatkala karya Agung ring Pura Besakih, salwire sane patut nyandang pacang rawuh ka desa Adat
8. Pinaka duta pacang matemuwang babawos ring sang sapisira ugi, yan paindikan punika kapineh nyandang pacang marginin
9. Wenang ngadegang Sabha Desa lan Kreta Desa, nanging yogya kabriyukin tur kacumpuwin antuk paruman Desa Adat Buitan
10. Wenang ngawangunang Pecalang Desa, sane patut ngalanglangin saraja karyan desa, nulinga katreptyan sawawengkon Desa Adat Buitan
11. Wenang ngadegang Tukang Banten
12. Prajuru Desa, Sabha Desa, Kreta Desa, Tukang Banten, patut mawinten majaya-jaya ring Pura Puseh Desa Adat Buitan, mungging dewasa pawintenan manut pamutus paruman Desa ri tatkala ngadegang Prajuru Desa inucap

### **Pawos 11**

Phalapeksaning Prajuru Desa :

1. Luput lan-lanan, nanging daging miwah salwiring wawijilan wyadin paturunan keni kadi patuting krama marep
2. Wenang polih twas-twasan
3. Miwah sane sewosan manut pamutus Paruman Desa
4. Sinalih tunggil prajuru desa sajeroning kantong madeg ngaonin, polih patulung beras 100 Kg lan kasa agulung saking desa

### **Pawos 12**

1. Indik ngadegang Tukang Banten
  - ha. Sane wenang kaadegang pinaka tukang banten inggih punika krama desa ngarep, sane waged sajroning indik banten, kasudi antuk Prajuru Desa saha kacumpuwin antuk Paruman Desa
  - na. Uning mamawos saha uning nyurat aksara Bali utawi Latin

### **Pawos 13**

Prajuru Desa, miwah Tukang Banten, kagentosin utawi usan, majalaran antuk:

1. Seda ;
2. Mabukti sungkan rahat tur suwe, kantos tibanan.
3. Mapinunas sangkaning rahayu, sasampun polih lugraha
4. Majalaran tutug sengker pangadege, sajaba tukang banten
5. Sangkaning kahusanang antuk Paruman Desa

### **Palet 3**

#### **Indik Sangkepan lan Paruman**

### **Pawos 14**

Munggwing sangkepan utawi Paruman sajroning wawengkon Desa Adat Buitan, kadi ring sor puniki :

1. Sangkepan Prajuru Desa, magenah ring Pura Puseh Buitan, wantilan desa, wiyadin genah sewosan, sanunggil dina Anggara kasih, yan tan kasidhan rahina punika, wenang rangkadang apanutan, teges ipun malih pitung rahina saking dina pasangkepane, utawi arahan saking desa.
  - ha. Maka manggalaning mababawosan sasajroning sangkepan, manggeh panglingsir utawi Prajuru Desa, utawi silih sinunggil prajuru Desa saking palugrahan Bendesa
  - na. Banjar-banjar, sekaa-sekaa sewosan, sane wenten sajroning Desa Adat Buitan, tan kalugra ngawentenang sangkepan, kalaning dina pasangkepan Desa, yen prade wenten mamurug ngawentenang sangkepan kala dina sangkepan desa, yogya sangkepan inucap kawangdeyang.

2. Indik Sangkepan

ha. Sangkepan ring desa luih ipun :

- 1). Sangkepan Prajuru
- 2). Sangkepan Krama Desa lanang
- 3). Sangkepan Krama Desa istri
- 4). Sangkepan Seka Gong
- 5). Sangkepan Banjar
- 6). Sangkepan Subak
- 7). Sangkepan Truna-truni
- 8). Sangkepan Dadia-dadia

na. Pamargin Paruman Desa

- 1) Paruman dados kawentenang padgatakala, manut werat wirasane sane pacang kabawosang, mawit saking pamutus babawos parareman sajeroning sangkepan Desa
- 2) Sangkepan banjar, sekaha subak, sekaha-sekaha sewosan sane wenten sajroning Desa Adat Buitan, kawentenang manut paswara, awig-awig sowang-sowang, nanging ugi mangda pungkuran ring sangkepan Desa

### **Pawos 15**

Tata kramaning sangkepan wiyadin paruman :

1. Saya patut makta pasayaan, tegap eteh-ete pasayaan, minakadi aturan cane setegap ipun.
2. Yan kapatut pacang nganggen babanten sakabwatan, prajuru Desa yogya mituduhang mangda cumawis, saha nyukserahang padagingan ring sang kapituduh makarya babanten ika
3. Silih sinunggil prajuru desa wenang nepek tetengeran ping kalih
  - ha. Kaprathama, sadurung ngawit upacara utawi maturan, pinaka pakeling mangda gelis carem
  - na. Sasampun carem, ngraris aturan punika kahantebang, mabriyuk muspa sareng sami kantos puput.
  - ca. Kaping kalih, swaran tengeran maka cihna sangkepane sampun ngawit

*Awig-awig Desa Adat Buitan,*

---

4. Babawosan sajroning sangkepan wiyadin paruman, ugi ngupadi karahayon jagat, minakadi ngarajegang kamuruban Ida Sang Hyang Widhi, majalaran bhawa laksana manut dresta
5. Yan wenten sinalih tunggil krama ngatengahang babawos, sajroning sangkepan, yogya kadamyakang. Yan nyandang bawosin, yogya rinawosan. Yan tan nyandang bawosin, hantukang ring sang ngamimitin
6. Sane kinucap pamutus babawos, wiyadin paswara sajroning sangkepan, minakadi paruman, yan briyuk sapanggul hanut sang nyangkepin, yan tan sapunika, asing akehan wenang turut manut panglokika. Pamutus babawos yogya kalekitayang, kalaksanayang manut hangeran ipun
7. Sangkepan punika kabawos sampun puput, yan sampun nimbalang hurak pagilih saya, saha sampun mabacak

**Palet 4**

**Indik Kukul**

**Pawos 16**

1. Sajroning wawengkon Desa Adat Buitan, wenten babacakan kukul kadi ring sor puniki :
  - ha. Kukul Desa ;
  - na. Kukul Pura
  - ca. Kukul banjar
  - ra. Kukul sekaa-sekaa sewosan
  - ka. Kukul kubu
2. Mungging swaran kukul punika mangda mabhina-bhinayan, sawiji sowang, manut sor singgih. Yan wenten swaran kukul pateh, karun wiyadin sawer, mangda kapastika salah sawiji antuk sang madruwe
3. Nepek kukul manut Tri Brata Sandhi: Dharmma, Sima, Laksana. Teges ipun:
  - ha. Dharmma :swaran kukul maka cihna wiyadin tatenger upacara Agama wiyadin yadnya
  - na. Sima :swaran kukul maka cihna wiyadin tatenger Panca Bhaya
  - ca. Laksana :swaran kukul maka cihna wiyadin tatenger patedunan
4. Indik tetepekan kukul manut pasobhaya, kuna dresta, minakadi paswara

5. Hunggwan nepek Kulkul :

- ha. Yan nepek kulkul tatenger patedunan, ugi kulkul sane kadruwe antuk sekeha, krama , sane pacang tedun, ketepek antuk sang patut ngulkulang
- na. Yan nepek kulkul tatenger Panca bhaya, wenang sahunggwan-hunggwan asing nampek genahe. Wenang katepek antuk sang rihinan manggihin bhaya punika, minakadi saking pituduh sang ngawiwenang
- ca. Yan nepek kulkul tatenger upacara Agama, Dewa yadnya, Bhuta yadnya, Manusa yadnya , Pitra yadnya, wenang kulkul sane wenten ring swang-swang genah upacarane. Yan nyelang kulkul sewosan patut wenten palugrahan sang ngawiwenang
- ra. Yan kalaning ngalungayang Bhatara, mendak Bhatara, Bhatara turun kabeh, kalaning pacaruan desa, sami kulkule sasajroning desa dados swarayang, tetepekan manut krama.
- ka. Yan wenten sinalih tunggil mamurug, nepek kulkul tan manut krama, yogya kabawosan antuk prajuru Desa, katiwakin panglokika, saha pamidandha manut paswara.

**Palet 5**

**Indik Druen Desa**

**Pawos 17**

Sane kadruwe antuk Desa Adat Buitan, Iwire :

1. Pura Kahyangan Tiga :

- ha. Pura Desa utawi Pura Bale Agung
- na. Pura Puseh
- ca. Pura Dalem, Pura Prajapati, Penguluning setra

2. Pura Panyimpenan

3. Pura Galuh utawi Pura Paneduhan,

4. Pura Bedugul

5. Pura Segara

6. Pura di Catus Pata

7. Palemahan sane kaanggen karang pomahan, miwah tlajakan karang

8. Palemahan sane kaanggen setra

*Awig-awig Desa Adat Buitan,*

---

9. Palemahan sane kaanggen margi, rurung-rurung, basang tlabah sajroning Desa Adat Buitan
10. Banjar-banjar Adat sane wenten sasajroning Desa Adat Buitan
11. Tanah tegalan lan Karang suwung manut ilikita, sane wenten sajroning Desa Adat Buitan
12. Lembaga Perkraditan Desa ( LPD)
13. CBD

**Pawos 18**

Piolihi-olihi Desa Adat Buitan

- ha. Urunan, panahub, pakenin-kenin pakaryan krama desa
- na. Haturan, dana, punia
- ca. Kontrak tanah desa, carik
- ra. Pasabuhan

**Palet 6**

**Indik Laluputan**

**Pawos 19**

1. Luput lan-lanan punika mateges tan keni pamijilan lan-lanan salwir ipun ritatkala Desa Adat Buitan ngangkat karya krama desa. Sapunika taler ritatkala ngaci-aci salwire sane dados hemponan krama desa sareng sami
2. Sane luput lan-lanan, lwire :
  - ha. Prajuru Desa
  - na. Pamangku Desa
  - ca. Juru Tanding/ Serati
  - ra. Krama sane nglaga
  - ka. Saya Perantenan lan Saya Tungguh
  - da. Sang sungkan tahunan
  - ta. Sang cedangga banget
  - sa. Wong alit ubuh
  - wa. Sang sapisira ugi sane kalugra antuk Prajuru Desa, manut pararem

**Palet 7**

**Indik Dadosan Patedunan**

**Pawos 20**

Dadosan patedunan, sangkepan, tedun makarya miwah sane sewosan, nganutang sukreta sowang-sowang, lwire :

1. Yan prajuru desa madruwe patedunane, yogya nganggen sukretan desa, sane kagaduh antuk prajuru desa, dadosan ngaranjing ka desa
2. Yan babanjaran madruwe patedunane, yogya ngangge sukretan banjar sowang-sowang sane sampun kagaduh antuk banjar Adat punika, dadosane ngaranjing ka banjar Adat
3. Yan seka-seka sewosan madruwe patedunane, yogya nganggen uger seka sowang-sowang, dadosane ngranjing ka seka
4. Yan wenten krama sinalih tunggil tan tinut ring tatepasan miwah dadosan punika, wenang babawose katengahang ka desa, prajuru desa yogya mamawosin

**Palet 8**

**Indik Bhaya**

**Pawos 21**

1. Sane kinucap Panca –bhaya, lwiripun : Jiwa bhaya, Aghni bhaya, Toya bhaya, Artha bhaya, Bhayu bhaya
2. Salwiring bhaya wenang gegerak antuk swaran kulkul.
3. Sang sapasira ugi krama desa sane manggihin, wyadin huning ring panangkaning bhaya ring sang katiben bhaya, wenang ngegerak nepek kulkul manut indik kakulkullan bhaya, raris damyakang ring wadesa
4. Ri kala wenten swaran kulkul bulus tatenger bhaya, krama desa patut yatna, sayaga, saha sregep ngamong prabot wiyadin gagawan sowang-sowang
5. Yan sampun tatas ring bhaya punika, krama desa patut matulung nambakin wiyadin ngamehehin bhaya punika, manut hunggwan, kalih manut patuduh sang yogya ngawiwenangang
6. Sang sapasira ugi tan kawasa majajabur ri kalaning desa, krama desa, katiben bhaya. Yan wenten sinalih tunggil kacirenan mamurug, yogya katengahang ka desa, wiyadin katur ring sang amawa bhumi, mangda kabawosan



7. Yan pinganan bhaya punika sampun kapineh nahnah, tan pacang nyengkalen, wenang kacihnayang antuk swaran kulkul lambat atuludan, wiyadin pasiyar saking sang ngawiwenangang

**Palet 9**

**Indik Rarampagan lan Kekeran Desa**

**Pawos 22**

Sane wenang rampag, lwire : taru sane mabuwat pacang mangge wawangunan ring pura-pura panyiwian desa sane wenten sajroning tanah druwen desa, raramon ron, busung, hambu, sahang, bungkak rikala desa wiyadin banjar maduwe karya manut dresta. Hunggwan kalih pidabdab ngarampag, mungguh sajroning pararem Desa

**Palet 10**

**Indik Panyanggran Banjar, Krama Desa**

**Pawos 23**

1. Saraja karyan Banjar kasanggra antuk krama banjar sowang-sowang, kahunadikayang antuk klian banjar.
2. Saraja karyan Desa, kasanggra antuk krama desa, kahunadikayang antuk Prajuru Desa, karemba antuk klihang-klihang banjar

**CATURTAS SARGGAH**

**SUKERTA TATA AGAMA**

**Palet 1**

**Indik Dewa Yadnya**

**Kaping 1**

**Indik Kahyangan**

**Pawos 24**

1. Pura Puseh, Pura Bale Agung, Pura Dalem, Palinggih Prajapati huluning setra, Pura Panyimpenan, Pura Paneduhan utawi Pura Galuh, Pura Segara, Pura Bedugul lan Palinggih Pesimpangan Betara Dalem Peed, kahemponin antuk desa, indik pangaci-aci manut kuna dresta, gagadhuhan kalih pamutus pararem desa.

### *Awig-awig Desa Adat Buitan.*

---

2. Sajabaning Kahyangan Desa, papayon kalih pangaci-aci kahemponin antuk krama desa sane nyungsung Bhatara ring pura punika sowang-sowang.
3. Yan wenten karecehan, wicara sajroning Pura, kahyangan, wenang katengahang ka desa, prajuru desa mamawosin, nyahsahang, nepasin wicarane, mangda kasidhan mawali landuh jati mula.
4. Tan wenang nguwah nguwuhin wawilangan palinggih Bhatara, sane sampun wenten ring pura kahyangan desa sowang-sowang, mangda kantun manggeh kadi sane katami saking kuna.
5. Yan wenten sinalih tunggil pura kahyangan, reneng pangaci-acinya, kantos kadasa warsan, yogya prajuru desa mamawosin, maritetes, ngutsahayang mangda kasiddhan mawali kadi jati mula. Nanging prade tan kasiddhan, majalaran antuk pamutus paruman desa, prasidha desa ngawangunang pangupacara mralina Pura punika, mangda tan karanjingan kaumahan antuk Ki Bhuta Kubandha

#### **Kaping 2**

#### **Indik Pangaci-aci**

#### **Pawos 25**

1. Indik pangaci-aci, ring Pura Kahyangan Desa, kahamongin antuk krama desa, sowang-sowang pura madruwe gagaduhan, pinaka uger pangaci-aci, miwah babanten.
2. Sane yogya muput aci-aci punika, sulinggih sane katuhur antuk krama pangempon Pura sowang-sowang, minakadi Pamangku ring Pura hinucap.
3. Pemangku desa punika wantah pamangku Pura Puseh, Pura Desa utawi Bale Agung, Pura Dalem, kalugra nganteb banten pangodal minakadi sane sewosan ring pura-pura sane wenten ring sawewengkon Desa Adat Buitan sane mamuwatang.
4. Ritatkala Desa ngawangun karya Tabuh gentuh, Bhatara Turun Kabeh, minakadi karya agung sawosan, desa wenang nyarad pamangku-pamangku kahyangan sakatahe pacang ngarembo pamangku desa.

#### **Pawos 26**

1. Indik pangaci-aci ring pura Pamrajan, Pahibon, Dadya, punika kahemongin antuk krama desa sajroning, Pamrajan, Pahibon, Dadya manut sima drestanya sowang, tan singsal ring ucaping sastra Agama Hindu.

2. Ri tatkala Bhatara turun kabeh raris makiyis, Bhatara ring Pamrajan, Pahibon, Dadya, tan sareng ngalungayang, nanging ugi mangda ngiyas pura saha ngadegang Bhatara utawi nyejer.

**Pawos 27**

Carik sane wenten ring wawidangan Desa Adat Buitan kahaci-hacinin antuk krama desa sowang-sowang. Dina pangaci kalih babanten manut dresta.

**Pawos 28**

1. Pangaci-aci ring Kahyangan Desa, lwire :
  - ha. Pura Puseh, kala Purnama Katiga;
  - na. Pura Desa utawi Bale Agung, kala Purnama Katiga;
  - ca. Pura Dalem, Pura Galuh utawi Peneduhan, kala sasih Kadasa, pananggal nemu kajeng;
  - ra. Prajapati Pangulun Setra, kala tilem kasanga;
  - ka. Pura Panyimpenan, rikala Buda Kliwon Pahang;
  - da. Palinggih Pasimpangan Bhatara Dalem Peed rikala Tilem Kapitu;
  - ta. Pura Ulun Suwi, Pura Segara rikala sasih Kadasa nemoning Kajeng Kliwon;
2. Pangaci-aci kasanggra antuk krama desa.
3. Babanten, minakadi heed upacara, manut gagaduhan dresta sowang-sowang pura.
4. Padagingan pangaci-aci mawit saking:
  - ha. Paturunan utawi wawijilan krama desa;
  - na. Upon-upon saking padruwean desa;
  - ca. Pioli-oli pagunakayan krama desa;
  - ra. Haturan-haturan krama sangkaning suka nirmala;
5. Pangaci-aci sane masuksma pangayu-ayu ring Pura Ulun Suwi utawi Bedugul lan Pura Segara nunas kalanduhan, mupu sarwa tinandur utamine ring carik kamargiang ngawarsa sakadi ;
  - ha. Neduh sasih kadasa sausan aci ring Pura Dalem nemu kajeng utawi kajeng kliwon.
  - na. Mabyukukung sasih kadasa sausan Neduh nemoning kajeng kliwon.

6. Pangaci sane masuksma mahayu jagat kamargiang ring jaba tengah pura Puseh rikala panglong ping 13 sasih kasanga. Ring Catuspata rikala tilem kapitu lan tilem kasanga.
7. Pasegehan tunggil kajeng kliwon, purnama tilem, kasanggra antuk pamangku sowang-sowang. Prabya saking druwe pura, kahantebang antuk pamangku pura sowang-sowang.
8. Sane nganteb salwiring aci-aci ring Pura Kahyangan Tiga miwah sapanunggilan ipun wantah Pemangku pura sowang-sowang, sejabaning melaspas palinggih, Ida Sulinggih sane muput, katuhur antuk desa, kasanggra antuk Pemangku Desa.
9. Ri kala kabrebehan jagate, kagringan, katiben panca- bhaya, pinganan tan mresiddhayang ngaturang haci kadi patute, yogya prajuru desa miwah pamangku, ngaturang pihuning ring Bhatara, masadhana babanten padhatengan, pacanangan, maka cihna tan pegat haci-hacine. Ri wus mawali degdeg jagate, patut ngawangunang upacara Bhatara Turun Kabeh, masasirih makakobok ka segara giri.
10. Yan ritatkala mamahayu, ngayum papayon, ring pura-pura kahyangan, pinganan tan puput kala dinaning piodalan, pangacine wenang rangkadang, nanging padhatengan, pacanangan, tan dados pegatang. Ri wus puput masasapuh salwire, mawali kadi nguni.

### **Kaping 3**

#### **Indik Pamangku**

#### **Pawos 29**

1. Pidabdab ngadegang pamangku ;
  - ha. Sane wenang kaadegang dados pamangku krama ngarep purwa.
  - na. Ngambil saking saserod Santana wiyadin katurunan
  - ca. Saking pamuwus sasemburan, wiyadin nyanjan, sasampun pinih kidik kantos ping tiga
  - ra. Sangkaning kajujuh saha kabriyukin antuk krama Desa Adat Buitan
2. Sang sapasira ugi pinaka jan banggul pamangku ring Pura-pura Kahyangan Desa Buitan, mangda pageh ngamel kalih ngalaksanayang sasanan Pamangku.

*Awig-awig Desa Adat Buitan.*

---

3. Sang sapisira ugi krama desa, sangkaning saserod, sangkaning kasenengan antuk Bhatara polih pamuwus ring sasemburan, minakadi kajujuh kabriyukin antuk krama desa, pacang kaanggen pamangku, yan kari alaki rabi yogya lanang istri mawinten.
4. Sang kasudi pacang kaanggen pamangku, patut mawinten ring Pura genahe dados jan banggul, munggwing prabeya kasandangin antuk Desa utawi pamaksan, dadia sowang –sowang
5. Sinalih tunggil pamangku yan katekan pati, patut polih prabeya atiwa-tiwa patulung marupa beras yogya polih 150 Kg lan kain agulung lanang istri
6. Tuwas-tuwasan pamangku, mungguh sajroning gagaduhan pamutus pararem Desa, taler nganutin dresta kuna.
7. Pamangku kagentosin majalaran antuk :
  - ha. Mapinunas mararyan, saking patut pinunase, nanging tan kari ngalaksanayang dharmaning Pamangku
  - na. Saking patut pinunase, majalaran antuk lingsir, sampun tan mampuh, sungkan rahat tan kengin waras, kanyadayang antuk krama pura, wiyadin desa. Kawekas kalaning seda, patut polih patulung atiwa-tiwa marupa beras 150 Kg lan kain agulung lanang istri
  - ca. Sangkaning kahusanang, majalaran antuk laksana mamurug sasanan Pamangku. Kawekas kalaning seda tan polih patulung prabeya atiwa-tiwa.

**Kaping 4**

**Indik Sukretan Pura Kahyangan**

**Pawos 30**

1. Ri kalaning maturan hamung Pamangku ring kahyangan punika sane dados mungguh tedun ring palinggih-palinggih pura kahyangan hinucap, minakadi sang sampun polih lugraha saking Prajuru Desa. Yan wenten mamurug, katiwakan dandha mrayascitta palinggih punika
2. Pamangku sane patut ngantebang babanten ring Pura, wantah pamangku sane kadruwe antuk Pura punika. Yan nenten wenten pamangku ring Pura punika, utawi kapyalang, dados nyarad Pamangku sewosan, sakeng palugrahan Prajuru Desa

*Awig-awig Desa Adat Buitan.*

---

3. Tan kalugra masumpah, macoran, sajroning pura kahyangan sinalih tunggil, sajaba sangkaning wicaran pura hinucap, taler saking pabuwat krama Desa sane ngempon pura punika
4. Tan kalugra wak capala, hasta capala, pada capala, miwah sapanunggilanipun, sajroning Pura Kahyangan. Yan macihna wenten mamurug, wenten raris ngatengahang ka desa, yogya tiniwakin dandha pamarisuddhan kahyangan
5. Tan kalugra malaksana kantos ngawetuang byota ring pura Kahyangan, minakadi: majajal/magerengan bilih-bilih yan jantos kanin/metu rah, yogya tiniwakin dandha gung artha manut pangarggan beras 100 Kg kang sawiji, saha marisudha kahyangan punika
6. Tan kalugra maprawrerti ala sakadi : makoratan, mawarih, masanggama miwah ala sewosan ring pura kahyangan, yogya tiniwakan dandha gung artha manut pangarggan beras 25 Kg saha marisudha kahyangan punika
7. Kramane sane manggihin utawi uning mungging wenten jadma ngaletihin kahyangan kadi mungging ring ajeng, patut atur uning ring prajuru; prade tan wenten nyadokang wenang kasisipang sinanggah saruron ring corah.
8. Sang sapisira ugi kacuntakan, salwiring cuntaka, yan durung mabresih, tan kalugra ngaranjing ka Pura Kahyangan. Yan katenger wenten mamurug, yogya kapidandha marisudhha kahyangan punika.
9. Tan kalugra ngawentenang kalecan, jajuden, sajabaning tabuh rah sajroning utama mandala, Madhya mandala pura Kahyangan.  
Yan wenten mamurug, sang ngalaksanayang katur ring sang amawa rat, tur kaklecan jajuden punika kawangdeyang
10. Tan kalugra makta salwiring sane kasinanggah tan suci ngaranjing ka sajroning panyenger Pura Kahyangan. Yan wenten mamurug yogya sang mamurug marisuddha Pura punika
11. Sang sapisira ugi rikalaning makemit, ring Pura Kahyangan, yan merem tan kalugra madukan lanang istri, sajaba anak kapineh kari alit durung bajang utawi teruna. Yan mamurug keni danda manut pangarggan beras 10 Kg kang sadiri tur mrayascita pura punika
12. Pamaksan sowang –sowang Pura Kahyangan sawawengkoning Desa Adat Buitan kalugra madruwe sukreta ndiri-ndiri nanging tan dados singsal ring Awig-awig Desa Adat Buitan

13. Pura Kahyangan tan wenang anggen sajaba ngalaksanayang upacara Agama Hindu. Yan wenten mabukti mamurug, sang malaksana kawangdeyang tur kapakardhinane kapuceh
14. Yan wenten sang sapasira ugi, katedunan utawi kapangluh sajroning pura kahyangan sawewengkoning Desa Adat Buitan, mamababawos minangkenang Ida Ratu Sesuhunan utawi Bhatara, di gelis tunasang tirtha laluputan mangda gelis hudep. Prade sampun kakatisin tirtha, kanton ngatemel masera masero, ngawetuang sumandeya kayun kramane, irika patut pintonin. Indike mintonin, ambilang toya apane, celebang liman nyane makakalih. Yan mabhukti tan belus, nyandang gega pangandikan Bhatara. Yan pade belus, tan nyandang gega, gelisang gingsirang genahang mangda doh saking pura punika

### **Kaping 5**

#### **Indik Cuntaka miwah Sosot**

#### **Pawos 31**

1. Sang sapasira ugi krama desa, sane kahanan cuntaka, tan wenang ngaranjing ka Pura Kahyangan
2. Lwir sane kinucap cuntaka :
  - ha. Anak istri kalaning ngrajaswala, suwen cuntakane, saking ngawit ngrajaswala, kantos nyat, macihna sampun mabresih
  - na. Sang nganten lanang istri, suwene cuntaka, ngawit saking rahina pangantenane, wiyadin marangkate, kantos puput mabyakawon, saha samayut prayascita, malukat matirtha
  - ca. Rama rena cuntaka sangkaning madruwe oka. Sane lanang cuntaka suwene pitung rahina saking hembas anake alit, kantos lepas hudel nyane. Sane istri pinaka rena cuntaka petang dasa kalih dina saking wawu hembas rarene
  - ra Yan anak istri karuron, cuntaka pateh ring ngembasang oka. Rabine cuntaka tigang dina
3. Cuntaka malarapan antuk kasedayan, kapatiyan :
  - ha. Yan sang ngarepin, minakadi sang magenah sajroning karang pomahan sang seda, suwene cuntaka, saking wawu seda kantos puput panglemek karyane. Punah cuntakane antuk marerebu, malukat.

- na. Sang madruwe kasedayan kacuntakan :
- 1). Tigang rahina prade kapendem, ngawit saking ngurugin rahuning nabuhin. Sadurung nabuhin lanang wadon sang maduwe kapademane luput ayah-ayahan, papeson miwah lanlanan
  - 2). Petang dasa kalih rahina prade sang kapendem ngadut manik, anak madruwe oka, naghing okane durung kepus hudel, sane kapendem sawan rare durung tutug kambuhan
  - 3). Pitung rahina prade ngaben, saking ngulapin ngantos panglemekan, ngraris mararebu
  - 4). Tigang rahina prade kasedayan rare durung maketus, saking nabuhin
- ca. Sang polih, ngarap sawa, ngamel saha ngarembat sahete-ete upakara palaning sawa luaring Desa Adat Buitan, cuntaka adina, punah cuntakane macihnayang antuk mabresih malukat
- ra. Yan sang manjing mijil ring umah sang ngraksa sawa, sasuwen sawa wiyadin layone karaksa, pateh cuntakane kadi sang ngarepin sawa ika, luwih yan tunggil siddhikara, pateh cuntakane kadi sang ngarepin sawa ika
- ka. Yan sang polih nyembah, mangan paridan sawa, punika taler kabawos cuntaka, suwene cuntaka kantos masiram mabersih
4. Cuntaka sangkaning malaksana mamitra ngalang, suwene cuntaka salami sadurung malukat/maprayascitta
  5. Anak wetu sangkaning smara dudu utawi tan pawidhi widhana pawiwahan, babinjat, punika taler cuntaka. Suwene cuntaka, salamine durung wenten meras, wiyadin nuduk ngangkenin piyanak, utawi nganggen dadaman
  6. Cuntaka sangkaning mabhukti madruwe panyungkan sane tan siddha waras salamine, kadi angganing hila, buduh, ngawijilang reged saking silit, bhaga purus, tan henap mameres, brung borok tahunan mabanyeh, miwah salwir punika Suwene cuntaka, salamine tan waras
  7. Yan wenten sinalih tunggil sang cuntaka antuk ngaraksa sawa wiyadin layon, mamanah utawi mapakayun ngarawuhin karya hayu Atma-Wedana, minakadi mabhakti ring sang wenang kabhaktinin, dados, nanging tan wenang ngarap, ngarembat, nyuwun, ngamel saupakaran puspa lingga.



*Awig-awig Desa Adat Buitan.*

---

8. Yan wenten sinalih tunggil krama desa durung tutug cuntaka kadi hinucap ring harep, mamurug larangan, yan wenten ngatengahanag ka desa, prajuru desa niwakang pamidandha, yogya sang mamurug marisuddha sakabwatan manut panglokika
9. Yan wenten sinalih tunggil anak istri, sangkaning tan meha ngrajaswala sasampun ring pura, wiyadin ring genah larangane sewosan, raris kacirenan, wenang ya tiwakin dandha tan meha, yogya marisudha genah punika
10. Yan wenten sinalih tunggil krama desa, kacuntakan antuk ngaraksa sawa, wiyadin layon, napkala pagilih pagentosan babanjaran ngaci-aci, ring sinalih tunggil kahyangan desa, pacaruan ring desa, sadurung tutug sengker cuntakanya, wenang tan tedun mayahan, tan dinosan, nanging yan wenten pasadok sang cuntaka ring prajuru desa. Yan wus tutug cuntakane, patut naregteg yan sasampun tutug sengker punah cuntakane, dados kahetang pangarga
11. Yan cuntaka gamya gamana, prakangge desa nyantosang pamutus sang amawa rat. Yan sampun wenten pamutus saking sang amawa bhumi, ring desa katiwakin dandha kadi ring sor puniki, lwire ;mangda mrayascita raga, genah malaksana, kahyangan desa. Prade yan katiwakin pamidandha mamandal, prasidha desa sane mrayascita desa miwah kahyangan, sang mamandal kabawosan ring desa, kaicen pamutus antuk prajuru desa, manut pamutus pararem desa
12. Cuntaka sangkaning mabhukti salah timpal, cuntaka ragan sang malaksana miwah desa pagenahanya, tutug cuntakanya yan sampun sang malaksana mrayascita panyangaskara raga, genah malaksana, selanturnya mrayascita Kahyangan Desa. Buron sane kaajak matemu smara, kapademang, bangken buron punika katanem
13. Anak luh beling tan kapariangken, suwenne cuntaka kantos lekad rarene saha wenten pangupakara panyangaskara kulawisuddha
14. Yan wenten anak mabhukti nyolong smara, cuntaka pateh ring cuntaka gamya gamana.

**Pawos 32**

1. Indik Sosot

- ha. Yan wenten sinalih tunggil pacang nahur sosot wiyadin punagi, salwiring punagi, gumanti sane patut nganggen pemegat sot, tan dados nahur sot yan tan kalaning dina piodalan Bhatara.

### *Awig-awig Desa Adat Buitan.*

---

Ngadasa dinayang aci-aci, sang pacang nahur punagi patut sampun masadok ring klihang lan pamangku, panahuran punagi ika kapuput antuk pamangku

na. Yan wenten sinalih tunggil nahur sasangi pacang ngaturang pangodal, ugi mangda ring dina pagantos piodalane. Sang nahur punagi, wenang nunas kanti patulung karya ring desa. Sang nahur sasangi nyukserahang daging cumek saprabeyaning pangodal ring desa

ca. Yan wenten sinalih tunggil nahur sasangi maturan swaran tangguran salwiring tatabuhan, sasalohan, minakadi salwiripun, mungging prabeya punika sami kahangganin antuk sang masasangi.

#### 2. Indik Haturan :

Sang sapasira ugi ngaturang jinah, mwan sarupaning barang, punika sami patut kahunadikayang antuk Prajuru Desa, haturan punika kaungghang sajroning lekita

#### 3. Sasarin Canang .

Sasampun puput pangaci-ci pujawaline, sasarin canang punika kapupulang saha kawilangin. Kahunadikayang antuk prajuru Desa

## **Palet 2**

### **Indik Rsi Yadnya**

#### **Pawos 33**

1. Krama Desa Buitan, yogya ngawreddhiyang kapradnyanan, kautaman Sang Hyang Aji, asewaka nunas pawarah ring sang maraga widagdha pradnyan, pingajeng ring sang kasinangguh guru loka
2. Prajuru Desa, klihang-klihang banjar, ngutsahayang kawreddhiyan kamuruban kaultaman Sang Hyang Aji ngawentenang paruman-paruman, parembuhan, pinaka genah krama desa mamangguh pawarah-warah hayu
3. Kalaning diwasa hayu, wenang desa atirthayatra, wenang desa ngaturang puniya miwah rsi bhojana ring Ida Sulinggih, taler kalaning karya utama, ring Desa Adat Buitan, salwiring karya sane kaputus antuk Ida Sang Sulinggih patut ngaturang punia. Asapunika taler ring sang mapitulung wenang maweh dana

4. Sang sapisira ugi krama Desa Buitan yan mapakayun pacang mapodgala, taler mangda wenten pasadok mapihuning ring Prajuru Desa, sajaba patut polih Palugrahan saking Parisadha Hindu Dharma Indonesia
5. Prajuru Desa, mamatut pisan, yan krama desane mapunya ring sang prajnyan, ring sang widagdha, ring sang satata ngarajegang dharma pingajeng ring Sulinggih pasuryan nyane sowang-sowang

### **Palet 3**

#### **Indik PitraYadnya**

#### **Pawos 34**

1. Pamargi ngupakara sawa, ugi manut linghing sastra Agama Hindu. Wenten makudang-kudang soroh, sakadi hinucap ring sor puniki :
  - ha. Mapendhem ring prathiwi
  - na. Makingsan ring ghni,
  - ca. Atiwa-tiwa, utawi palebon utawi ngaben
  - ra. Yan rare durung makupak huntu, wus kepus hodel hantaka, wenang ngangge pangentas bangbang masadhana klungah kelapa gadhing, ngaran ngalungah, tan wenang tiniwaken
  - ka. Yan rare durung kepus hodel , pamali ngaran, pendhem juga tan hana pangupakaranya, kewala ganten utawi hadem paicchan Ida Sulinggih
2. Sang sapisira ugi krama Desa Adat Buitan, tan kawasa makta sawa ka desa Adat, yan sawa ika sampun keni pangupakara sawa.

Yan wenten mamurug, yogya katiwakin dandha, mrayascita marisuddha desa
3. Salwiring upacara atiwa-tiwa, palebon, ngaben, ring setra ugi kawenanganya, tan wenang ring desa Adat, sajaba malebonang Ida Sulinggih. Yan wenten mamurug, wenang dandha marisuddha desa, krama desa sang atulung dandha artha manut pangargan beras 100 Kg kang sadiri.
4. Yan wenten krama desa ngurung sawa, macamana, mabresih, kawenanganya tan kalugra lintangan ring tigang sasih ngawit saking dina sedane. Yogya murnama tilem, miwah salwiring upacara rerahinan. Yan kalaning angurung sawa, sajroning Desa Adat Buitan kawangunang Karya Agung kantos nyuci gening, lwire matabuh gentuh, Bhatara turun kabeh, karya Agung ring Besakih yogya tumpang

*Awig-awig Desa Adat Buitan.*

---

salune tedunang saking balene, genahang ring natah umahe, saking Bhatara kaodhal kantos ida masineb, sajaba layon Ida Padanda.

5. Tan wenang nyekeh sawa ring pumahan yan tan macamana, mabresih, lintangan ring roras dina, ngawit saking dinane seda. Yan wenten mamurug, dandha gung artha manut pangargan beras 100 Kg saha mrayascita desa
6. Sang sapisira ugi krama Desa Adat Buitan tan wenang atiwa-tiwa, rikala pangacin-acin Desa Iwire ; Patirthan, patoyan, Usabha ring Pura Kahyangan Desa, Bhatara Turun Kabeh, Tabuh Gentuh minakadi karya agung sewosan ha. Yan piodalan patirthayan, patatoyan, pangusabhan, ring Pura Kahyangan Desa, saking mitung dinayang aci-aci, kantos Bhatara puput masineb na. Yan karya matabuh gentuh, Bhatara turun kabeh, minakadi salwiring karya sane nyuci gening, saking ngawit nyuci kantos Bhatara puput masineb ca. Yan kalaning Bhatara ring Besakih lungha makakobok ka Klotok, saking ngawit nyuci gening ring Besakih, kantos Ida Bhatara puput masineb. Yan wenten mamurug, dandha mrayascita desa, minakadi krama desa sane matulung dandha gung artha manut pamutus pararem
7. Yan wenten krama mendhem sawa kalaning dina malarang, kawasa, nanging ugi masawen, durung magagumuk masusunin bintak, laku kingsan ngaran
8. Yan makingsan ring ghni, sawa gineseng, hasti hinanyut, manut krama. Yogya ngangge tirtha pabresihan. Mungging dewasa, sa sor ipun dewasane dados marginin mendem sawa.
9. Indik Padewasan :
  - ha. Padewasan mendem ring prathiwi, makingsan ring ghni, wenang katiwakang antuk Prajuru Desa, manut pasobhaya.
  - na. Padewasan atiwa-tiwa, katiwakang antuk Ida Sang Sulinggih sane pacang muput, yogya sampun kapatut antuk Prajuru Desa
  - ca. Indik larangan ngupakara sawa, sajaba ngungghang ka tumpang salu, sane kamanggehang sajroning Desa Adat Buitan, Iwire ; Buda Wage, Saniscara Kliwon, Anggara Kliwon, Radite Umanis, Sukra Pon, Saniscara Wage, Radite Kliwon, ika Semut sadulur.  
Sukra Kliwon, Saniscara Umanis, Radite Pahing, ika Kala gotongan .  
Yan ring dora, mwah ring tanggal panglong ping 15, tanggal panglong ping 14, mwah tanggal panglong ping 1. Wrehasapati ingkel wong.

- Yan wenten sinalih tunggil mamurug, wenang dandha gung artha manut pangargan beras 100 Kg, saha mrayascita desa, miwah nenten dados ngangge piranti; margi, setra duwen desa
- ra. Tan wenang ngagah ngulung, teges ipun, sajroning setra tunggil, tan dados mresihin sawa, nuju dina pangutangan yan ring setra punika wenten ngalaksanayang pangabenan, Yan wenten mamurug, dandha gung artha manut pangargan beras 100 Kg saha mrayascita setra
- ka. Tan wenang ngutang ngirim, teges ipun, sajroning setra tunggil, yan wenten ngirim, tan dados sane sewosan mendem sawa, minakadi atiwa-tiwa, ngaben, ring dina punika. Yan wenten mamurug, yogya dandha gung artha manut pangargan beras 100 Kg, saha mrayascita setra
10. Yan sawa sangkaning salah pati, ngulah pati, mati kapangawan, minakadi salwir ipun, desa tan ngalarangin, yan sawa punika tiniwaken, pramangke. Sara ledang sang madruwe, minakadi Ida Sulinggih sane pacang muput
11. Yan wenten sinalih tunggil sawa, genahe seda wiyadin padem sajabaning karang pomahan, lwire : ring tegal, ring carik, pura, pasar, banjar, sekolah, minakadi genah sewosan dudu karang pomahan, yogya sang madruwe wirange mrayascita marisudhha genah punika. Yan sawa tan kaparihengkennan, genah punika patut kaparisuddha kaprayascita antuk sang madruwe hemponan

#### **Pawos 35**

Indik Angatma wedhana

1. Sang sapisira ugi krama Desa Adat Buitan, yan kalaning angatma wedhana lwire : Ngeroras, patileman, baligya, tan wenang ngawangunang payadnyan, petak ring Pura Kahyangan Desa, minakadi kahyangan sewosan
2. Sang sapisira ugi wus ngawangun karya angatma wedhana, yogya karang ika kapralina, sakasep ipun petang dasa kalih dina saking dina karyane.

#### **Palet 4**

**Indik Manusa Yadnya**

#### **Pawos 36**

1. Sang sapisira ugi krama Desa Adat Buitan, ngawangunang salwiring upacara manusa yadnya, tan wenang magenah ring wewidangan palemahan kahyangan

### *Awig-awig Desa Adat Buitan,*

---

- panyiwian Desa. Yan wenten sinalih tunggil mamurug, wenang dandha gung artha manut pangargan beras 500 Kg, saha mrayascita marisuddha pura punika.
2. Sang sapasira ugi krama desa sane pacang kahadegang dados pamangku, pinaka jan banggul Bhatara ring pura kahyangan desa, kalugra mawinten magenah ring pura hinucap. Taler sane kahadegang pinaka prakanggen desa, wenang mawinten majaya-jaya ring pura Puseh
  3. Indik manusa yadnya sane dados kamargiyang sajroning Desa Adat Buitan ugi sane nganutin dresta minakadi sastra Agama

### **Palet 5**

#### **Indik Bhuta Yadnya**

#### **Pawos 37**

1. Sajroning Desa Adat Buitan, pacaruwan manut hunggwan, kalih sor singgih, lwire:
  - ha. Pacaruwan desa sadakala :

Manca-satha ngamasa-masa, kala tileming kasanga, magenah ring catus pathan banjar sowang-sowang
  - na. Pacaruwan desa padgatakala, ri kala jagate kabrebehan, kagringan, kadurmanggalan, katiben panca-bhaya, miwah sane sewosan sane patut caronin.
  - ca. Agung alit caru, manut hunggwan caru, babwatan pacaruan, kalih nista madhya uttamaning caru
2. Pacaruwan ring pura-pura kahyangan, pamrajan, dadya, salwire, manut drestan pura sowang-sowang, minakadi awig-awig gagaduhan pura hinucap
3. Pacaruwan ring sajroning Desa Adat Buitan, kala sasih Karo, Tilem Kapitu, Tilem Kasanga, raris pacaruwan ring karang pomahan sowang-sowang
4. Yan wenten sinalih tunggil pura kahyangan, salwire, reneng pacaruane kantos tigang plabuh, wenang prajuru desa mamawosin. Yan wus puput babawose yogya maguru piduka, ngawit masasapuh, mangda kasiddhan ngaturang pangaci-aci

5. Yan wenten sinalih tunggil banjar Adat, reneng pacarune ngantos tigang plabuh, yogya Prajuru desa sane ngawiwenang mamawosin. Yan puput babawose, yogya katur ka Desa, prajuru Desa mamawosin tur ngicenin pamutus
6. Pacaruwan kalaning Tilem Kasanga, ring karang pomahan sowang-sowang manut sastra dresta, kalanturang antuk brata panyepian

## **PANCAMAS SARGAH**

### **SUKERTA TATA PALEMAHAN**

#### **Palet 1**

#### **Indik Tegal, Bangket, lan Karang**

#### **Pawos 38**

1. Palemahan Desa Adat Buitan , mahuger antuk Tri-Mandala, lwire :
  - ha. Utama mandhala : palemahan sane kaanggen karang pura, wiyadin parhyangan
  - na. Madhya mandala : palemahan sane kaanggen karang pomahan, genah wawangunan, sakadi : banjar, sekolah, kantor, klinik, miwah sane sewosan
  - ca. Nista mandala : palemahan sane kaanggen setra, margi, rurung, tlabah, papunduk, tulak tanggul, miwah sane sewosan.
  - ra. Sahanan palemahan sane wenten ring wawengkon Desa Adat Buitan, yogya mangda madruwe babaledan wiyadin wates sane pasti.
2. Sahanan palemahan punika, ugi mangda madruwe marggi, rurung, papunduk sane dados hentasin
3. Yan wenten pakarangan pura, pomahan, tegal, carik, miwah palemahan sewosan kabebeng tan madruwe marggi, rurung, miwah papunduk, sang madruwe patut ngatengahang babawose ka Desa. Prajuru Desa yogya negdeg, ngutsahayang mangda polih marggi malarapan sami suka. Yan patut matumbas, manut pangargan tanah sane kamanggehang antuk sang mawa rat, sami katahur antuk sang mamuatang.
4. Yan Desa pacang ngalinggahang margi, rurung, minakadi makarya margi, rurung Desa, saking sampun hingkup paswaran Desa sareng sang madruwe tanahe, yan nganggen tegal, carik, miwah palemahan sewosan wenang tan nahur pangargan

### *Awig-awig Desa Adat Buitan.*

---

- tanah punika. Nanging yan madaging tatanduran, papayon, wawangunan salwire, desa patut ngicen prabeya agung alit manut pamutus parembug Desa kala punika.
5. Sahananing karang pomahan ugi mangda masengker. Pidabdab nyengker magaleng ka dulu. Panyengker sane sisikangin, miwah sisi kaler, patut kakaryanin antuk sang ngenahin karang punika. Sajaba karang ngele, wiyadin lingkehin rurung, palemahan suwung. Yan babaledan bangket ugi magaleng ka teben
  6. Sang sapasira ugi ngenahin karang tegehan, patut naku, tegehe asukat natah dangsah, sane tebenan wenang nyusunin tembok.
  7. Telajakan karang patut kapiyara antuk sang ngenahin karang punika sowang-sowang, mangda mapikenoh tur kanten hasri
  8. Yan wenten sinalih tunggil nyadya nyaleksek wiyadin ngaleklek babaledan, salwiring babaledan wiyadin wawatesan, lwire : babaledan wiyadin wates pura, karang pomahan, carik, tegal, setra, tlabah, jlinjing, margi, rurung, papunduk, miwah sane sewosan, yogya katiwakin danda manut werat ringan kahiwangane, saha mahayu sane kasaleksek wiyadin kaleklek, kalih mrayascitta saka bwatan sane nyandang katibanan panyangaskara.
  9. Yan hana sinalih tunggil ngaletihin, ngarucakin, ngarobedin, ngararabin, palemahan luaring pomahan padruweyan nyane, lwire : ngutang luhu, bangkaan, miwah salwir ipun, nyorongang babanyon, yogya katiwakin danda gung artha manut pararem, mahayu sane kaletahan, karucakan, karobedan, raraban hinucap ring hajeng, saha mrayascitta sane nyandang keni panyangaskara.
  10. Yan wenten anak ngenahin palemahan sajroning wawengkon Desa Adat Buitan tan tinut makrama desa nganutin Awig-awig miwah pararem desa, tan kalugra nganggen salwiring padruweyan desa, tan kalugra ngalaksanayang Panca yadnya sajroning Desa Adat Buitan. Yan tekaning kapatiyan dados sahubang utawi pendem ring setra pangilang-ilangan. Tan polih panyanggran krama banjar minakadi panyanggran desa
  11. Krama desa sane pacang ngadol palemahan carik, tegal, miwah sane sewosan sane magenah sajroning wawidangan Desa Adat Buitan, ngadol ring anak saking dura desa, ugi mangda polih palugrahan saking Prajuru Desa.
  12. Yan wenten anak tan maagama Hindu ngenahin palemahan sajroning Desa Adat Buitan, patut nganutin Paswaran Desa Adat Buitan



**Palet 2**

**Indik Kakayonan**

**Pawos 39**

1. Tan kalugra nekteb, ngarebah, wit-witan salwir ipun, ring palasan, pategalan, abing, tangkid miwah genahe sewosan sane kakeker antuk desa. Yan wenten mamurug, katiwakin dandha manut lokika sajroning Paruman Desa, tur taru sane karebah mantuk ka Desa
2. Salwiring wit-witan sane sampun kacirenan wiyadin kasawenin antuk Desa, pacang mangge mapawangun ring Desa, pradene punika karebah antuk sang madruwe, yogya sang madruwe katiwakin dandha, manut pararem, taru wiyadin wit-witan sane karebah mantuk ka Desa, wiyadin ngetang pangarga
3. Yan wenten wit-witan wiyadin kakayonan ngungkulin palemahan anak sewos, sane ngawinang tiyeb, tampyas, ngarobedin, asing kungkulan wenang ngatengahang ka Desa, prajuru Desa maritetes saha mituduhang sang madruwe mangda ngrancap, nekteb, wiyadin ngarebah. Yan kantos ping tiga pituduh desane tan kalingu, wenang katiwakin dandha sang anikel tuduh, gung artha manut paswara. Kakayonan punika prasiddha karebah antuk Desa
4. Tanem tuwuh sajroning karang pomahan, tan kalugra tegeh ipun lintangan ring jan palit solas, wiyadin limang meter. Bungkil ipun adepa agung wiyadin kalih meter tengah, saking panyengkere ngajrowang. Yan mamurug, wenten raris ngatengahang ka Desa, yogya sang madruwe katiwakin dandha gung artha manut paswara, saha ngarebah, sajroning pitung rahina saking pamuput babawose
5. Kakayonan sajroning karang pomahan ugi mapyara mangda tan ngaletihin, ngarobedin, mamayen karang sewosan, saking akah kantos dawun ipun. Yan wenten mamurug, tan tulinga ring kakayonan duwe, wenten ngatengahang ka Desa, prajuru Desa yogya maritetes, saha nepasin manut panglokika kalih paswaran desa.
6. Yan wenten wit taru mentik kantos ageng ring babaledan, wates, salwiring babaledan mwang wates, wenten ngatengahang ka Desa, patut taru punika karebah, raris pinara tiga, apahtigayan mantuk ka Desa, sang madruwe babaledan apahtigayan sowang-sowang.
7. Yan wenten sinalih tunggil nundungin tanem tuwuh, kakayonan, sane kaswatah pacang mamayen, wenang kabawosang ring sang madruwe. Yan hakas sang

### *Awig-awig Desa Adat Buitan.*

---

madruwe, yogya katengahang ka Desa. Prajuru Desa negdeg tanem tuwuh wiyadin kakayonan punika. Yan manut panglokikan prajuru Desa yogya tundungin, taler hakas sang madruwe, patut sepat gantungin. Yan jati kadi panywatahe, yogya sajroning pitung dina, karebah picundangan. Sang madruwe katiwakin dandha gung artha manut pararem, dosane anikel tuduh. Yan tan yukti kadi panarkane, sang ngatengahang katiwakin dandha gung artha manut pararem, dosane angadakaken nora, tanem tuwuh wiyadin kakayonan punika tan karebah.

8. Yan wenten sinalih tunggil nyadya nandur pijer, turus, salwiring tanem tuwuh wiyadin kakayonan sane pacang dados ageng, nesek ring babaedan, ring wates papunduk, ugi mangda masupeksa ring Prajuru Desa, kalih ring panyanding sowang-sowang. Yan tan kalugra, tan kapisukayang, pradene taler kapurug, yogya sang mamurug katiwakin dandha gung artha manut pararem, tur ngamademang tatandurane
9. Yan wenten krama nandur pijer, poh, miwah salwiring tatanduran sane tuwuh ipun lintang ring limang warsa, ugi mangda makarya pasobaya ring sang madruwe tegal hinucap. Yan durung pinganan mawoh tubuh minakadi tatandurane sewosan punika, durung nahen ngalapin who ipun, raris kajabutin, yogya sang madruwe tegal nahur panjala sa wit-sa wit, gung artha manut pasobhaya, wiayadin pamutus Prajuru Desa
10. Sang sapisira ugi nyakap tegal, tan kawasa ngarebah tanem tuwuh sane dados anggen lakar wawangunan, tatandurane sane matuwuh lintangan ring limang warsa, yan tan polih lugra saking sang madruwe tegal punika
11. Yan wenten wit-witan sajroning pategalan, rebah sangkaning kapancabhaya, tan dados kajahin antuk sang sapisira ugi

### **Palet 3**

### **Indik Wawangunan**

### **Pawos 40**

1. Sang sapisira ugi krama desa, yan pacang ngawangun panyengker karang pomahan ring sawawengkon Desa Adat Buitan, patut masupeksa ring panyandinge. Yan tan radin, yogya nunas degdegan ring Prajuru Desa. Prajuru Desa negdeg sadu hajeng sang mawicara saha ngicen tatepasan.

*Awig-awig Desa Adat Buitan.*

---

2. Wawangunan ring palemahan pecak carik, tegal, palemahan suwung, sane sampun masanggah pawon, palemahan punika prasidha kabawos karang pomahan, dwaning sampun katiwakin pangupakaran karang. Awanan patut madruwe rurung betel ka marggi agung, sukat dados pacang ngalintangang papaga, dwaning tan patut nglintangang sawa ring carik miwah tegal. Yan wenten mamurug, yogya Prajuru Desa niwakang tatepasan mangda sang mamurug mrayascitta palemahan hinucap sane kalintangin.
3. Yan tan masanggah panghuluning karang, kabawos akakubon. Tan yogya genah angraksa sawa. Yan wenten mamurug, yogya katiwakin pamidandha mangda mrayascitta palemahan punika
4. Sang sapasira ugi, pacang ngawangun wawangunan genah ngalaksanayang upacara Agama, lwire: Pura, Masjid, Gereja, Wihara, miwah sane sewosan, ugi mangda wenten lekita palugrahan Prajuru Desa, kalih lekita palugrahan Guru Wisesa. Yan wenten mamurug, kabawos tan sidha karya, tan wenang anggen, tur wawangunan punika yogya wangdeyang.
5. Wawangunan sajroning karang pomahan, ugi nganutin Tri Mandhala., sanggar panghuluning karang pinaka Utama Mandhala, pagenahan mapumahan pinaka Madhya Mandhala, lebuw utawi jabayan pinaka Nista Mandhala.
6. Tan wenang ngungkulang capcapan wawangunan ka sajroning karang pomahan sewosan tani druwe. Yan wenten mamurug, wenten ngatengahang ka desa, yogya Prajuru desa negdeg, saha nyipat gantungin. Yan jati lintang, sajroning selahe dina saking puput babawose mangda sampun kapastika.
7. Tan wenang nganggen tembok umah wiyadin tembok panyengker tani druwe. Wenang ya kasambatsara antuk sang madruwe. Yan hakas tur mamurug sang kasambat sara, yogya katengahang ka desa, kabawosan antuk Prajuru Desa.
8. Sang sapasira ugi pacang mapawangun nepi ring marggi agung, nepi ring rurung desa, yogya wenten lekita palugrahan saking prajuru Desa, wiyadin lekita palugraha sang amawa rat. Yan tan polih lekita palugrahan, padgatakalan wawangunan punika dados katundung tan ngetang prabeyan tatundungan.
9. Sang sapasira ugi krama desa ngawengku karang pomahan, yogya hurati myara kahasriyan lebuw pakarangnya, rurung pentasan pinih sor asukat karangnya ngalajur.

10. Sang sapa sira ugi yan ngawangun karang paumahan ring tanah druwen desa utawi tanah pelaba pura, ugi mangden polih palugraha saking Prajuru desa utawi pamutus pararem desa.

**Palet 4**  
**Indik Wawalungan**  
**Pawos 41**

1. Sane kinucap wawalungan, sakancan buron suku- pat sane nyadya kapyara, sakadi: bawi, banteng, kebo, misa, jaran miwah sapanunggilan ipun. Taler watek makampid, sane nyadya kapyara, skadi: ayam, itik, angsa, dolong, miwah sabacakan ipun.
2. Sang sapisira ugi krama desa sane myara wawalungan suku pat, tan wenang ngalumar. Sane patut matlusuk, mangda matlusuk. Sane tan patut matlusuk mangda mategul bawong. Sane patut maglogor, makandang, ugi mangda maglogor wiyadin makandang. Mangda tan ngarucakin, ngaletihin palemahan tani druwe, miwah mamayen krama desa, jana pada. Yan hasu mangda mabelat, lwire makalung bawong, maka cihna wenten sane myara.
3. Sang sapisira ugi krama desa, myara watek suku kalih, watek makampid, yatnain ugi, mangda tan banget ngarucakin, ngaletihin, palemahan, pomahan, tatanduran druwen anak sewos.
4. Tan wenang ngangonang, negulang hingon-hingon, ubuh-ubuhan, ring palemahan tan druwe, minakadi tan sasakapan druwe, yan tan kapisukayang, sang madruwe palemahan, wenang nyambatsara sang madruwe wawalungan ika. Yan hakas sang kasambatsara, sang madruwe palemahan wenang ngatengahang ka desa, miwah wawalungan ika wenang ka taban. Prajuru Desa yogya niwakang pamidandha, manut lokika, gung artha manut pamutus pararem.
5. Tan wenang ngangonang, negulang ubuh-ubuhan, ring palemahan karang pura, kahyangan salwir ipun, minakadi setra, rurung, papunduk, margi, tlajakan ring hajeng palemahan sane kapingitang, miwah sabacakan ipun. Yan wenten mamurug, sang madruwe palemahan, prajuru desa, langlang desa, kliyang banjar, asing mamanggihin, wenang nyambatsara, saha naban wawalungan ika. Katengahang ka desa, katiwakin dandha gung artha manut pararem, saha mahayu yan wenten karusak, tur mrayascitta palemahan ika sane nyandang prayascitta manut panglokika.

*Awig-awig Desa Adat Buitan.*

---

6. Yan wenten maubuh-ubuhan sajroning karang pomahan ugi mratyaksayang kandang ipun, mangda tan ngawetuang bhaya, panyungkan. Taler mangda hapik, guriten, siksa, mangda tan ngantos ngaletihin, ngarobedin, crobo karang pomahan wiyadin palemahan panyandinge. Yan wenten mamurug, tan siksa ring hingon-hingon, miwah kandang ipun, wenang panyandinge nyambatsara, saha katengahang ka desa. Prajuru Desa nepasin miwah katiwakin dandha manut panglokika kalih paswaran desa.
7. Sang sapasira ugi , ngawangunang kandang wawalungan, buwat adol atuku, yan kandang ayam, itik, miwah sapanunggilan ipun, buwat naluhang, miwah adol atuku, dagingan seket ukud. Yan kandang wawalungan suku pat, dagingan limang ukud, sowang-sowang, ika wenang sasajroning karang pomahan.  
Yan lintangan ring punika daging kandange, tan wenang wangunang sajroning karang pomahan, yogya kawangunang ring palemahan sane mawaneng sa sor ipun satus depa saking palemahan karang pomahan, sekolah, kantor, pura, kahyangan, minakadi genah sane kakeker wiyadin kapingitang antuk Desa Adat Buitan tur mangda madruwe lekita palugrahan saking sang amawa bhumi.
8. Yan wenten wawalungan ngarucakin, ngarug tatanduran, wenang taban. Sang madruwe tatanduran ngatengahang ka desa pramangkin, kabawosan antuk prajuru desa, saha katiwakin dandha manut pararem.
9. Yan godel banteng, godel kebo, godel misa, durung matlusuk, godel jaran utawi bebedag, kambing, miwah sabacakan ipun, durung hantes mategul, tan wenang taban, yan tan ngajak hinan ipun. Yogya salabarang ring sang madruwe.
10. Yan bebek, dolong, angsa, ayam miwah sapanunggilan ipun, ngarucakin tatanduran, taler wenang taban. Indike naban mangda masaksi, saha kasupeksayang ka desa pramangkin, prajuru desa yogya mamawosin niwakang pamidanda manut panglokika.
11. Yan wenten wawalungan ngeleb, mamegat, ngranjingin palemahan pura, kahyangan, setra, karang pomahan, miwah sane sewosan, lokikanen juga. Yan tan nyadya kalebang, tan yogya taban, wenang salabarang ring sang madruwe. Yan nyadya ka lebang, wenang taban, tur katengahang ka desa
12. Sang sapasira ugi tan kalugra nyorongang babanyon laleteh kandang wawalungan ka tlabah, jalingjing, rurung sane wenten sasajroning Desa Adat Buitan. Yan wenten mamurug, katiwakin dandha antuk desa gung artha manut pararem.

Tur sajroning pitung rahina saking pamuput babawose, salantur ipun tan kari nyorong laleteh miwah babanyon punika.

13. Sang sapisira ugi ngarereh hulam ring tukade, ring segarane, ring tlababe, ring jlingjinge miwah sahunggwaning ulam sajroning Desa Adat Buitan, tan wenang nganggen tuba miwah listrik salwir ipun, tan wenang ngarusak hempelan, nguhukang tamuku, yan wenten mamurug, wenang katiwakin dandha gung artha manut pararem, tur mahayu sane karusakang.
14. Sang sapisira ugi tan kawasa maburu ring wawengkon Desa Adat Buitan, sejabo pacang manggen daging yadnya miwah sane kasinanggeh mrana.
15. Sakancan dadandhan, dadosan, sane mungguh ring hajeng, sami mantuk ka Desa Adat Buitan.

## **SAT SARGGAH**

### **SUKERTA TATA PAWONGAN**

#### **Palet 1**

#### **Indik Rangkat**

#### **Pawos 42**

1. Indik rangkat punika, manut desa kala patra, mwanng sima dresta, sane kapatutang tur katinutin antuk krama desa sowang-sowang, tan singsal ring uger-uger panagara, lwire :
  - ha. Papadikan
  - na. Ngarangkat utawi ngarorod
  - ca. Ngunggahin
2. Sajroning Desa Adat Buitan, indik rangkat ika yan sampun mawidhi widana pawiwahan, sanistanya mabiyakawon tur malukat, rangkat punika kasinanggah puput palikrama.
3. Yan wenten anak istri Desa Adat Buitan, karangkatang antuk sang sapisira ugi, lwih antuk anak saking dura desa, yan kantos arahina ring awengi saking dina matinggale saking jumah tan wenten pasadok, pajati, yoga sang madruwe wirange nunas kanti ring prajuru Desa, mangda ngamargiyang saserepan. Yan s ampun sinah genahnya, ngraris kamargiyang panegdeg.

### *Awig-awig Desa Adat Buitan,*

4. Sang sapasira ugi krama Desa Adat Buitan, yan karawuhan tamiu praya masinutan malarapan antuk ngorod, ugi mangda masadok mihuningang ring Prajuru Desa, Prajuru Desa yogya maritetes, yan sangkaning tan patut pamarggin rangkatnya, prajuru desa nguduhang mangda katur ring sang amawa rat. Yan wenten krama mamurug, yogya sang mamurug dandha gung artha manut pangarggan beras 50 Kg
5. Yan wenten sinalih tunggil krama Desa Adat Buitan, ngamet anak istri antuk malegangang, mamendet, marikosa, miwah salwir ipun, tan sangkaning sami demen, tan yogya pinuput widhi widhana pawiwahannya sadurung wenten pamutus saking Guru Wisesa
6. Yan wenten sinalih tunggil saking dura desa, pacang muput rangkat kawawengkon Desa Adat Buitan, sang madruwe wirang luh yogya nunas pasaksi ring Prajuru Desa Adat Buitan, sinalih tunggil mangda wenten ngarawuhin
7. Yan wenten anak istri saking Desa Adat Buitan merangkat, ring sampun puput rangkat punika, raris nyongkol ka umah wirang istrine, patut ngaturang panebas kanya ka Desa Adat Buitan gung artha manut pangarggan beras 25 Kg

### **Palet 2**

#### **Indik Palas Makurenan Utawi Nyapian**

### **Pawos 43**

1. Sane kabawos nyapian, punika sang palas marabi, palas makurenan, sane sampun katiwakan pamutus antuk Guru Wisesa
2. Yan wenten sinalih tunggil krama desa, ngarangkatang sapiyan, sadurung tigang sasih utawi 105 dina, saking dina palase, yogya sang ngarangkatang sapiyan punika keni dandha pakerang manut pangarggan beras 100 Kg
3. Krama desa sane belas marabi utawi makurenan, sasampun polih pamutus saking Guru Wisesa patut masadok mihuningang ring klihang banjar, mangda kadamyakang ring banjar, ring desa, sakasep ipun asasih saking palase
4. Yan wenten anak istri wit saking Desa Adat Buitan nyapian ring dura desa, mawali ka desanya, yogya sang madruwe wirang matur supeksa ring Prajuru Desa, saha mrayascita marisuddha anake luh punika. Yan tan kaparisuddha antuk wirangnya, patut marisuddha raga, mangda kabawos nirmala

5. Yan wenten anak istri matinggal saking lanange tur wenten magenah ring wirang istrine lamine lintang ring nem sasih, saha sampun polih panregteg saking lanange kantos ping tiga, patut katur ring Prajuru Desa, mangda kabawosan

**Palet 3**

**Indik Balu**

**Pawos 44**

1. Sane kabawos balu, anak istri sane katinggal seda antuk rabine. Yan anak lanang seda rabine, wiyadin katinggal nyapian, taler kawastanin balu.
2. Yan wenten sinalih tunggil krama desa lanang balu, wiyadin istri balu, ngawengku karang desa, yogya nawur panigasanan beras 5 Kg satunggil Usabha Puseh
3. Yan wenten sinalih tunggil anak istri balu, marangkat, yogya rangkat punika kapuputang antuk wirang lakine rihin, yan babalon punika kari pageh
4. Mungging wawenangan babalon luh, ring indik wawarisan, minakadi sane sewos-sewosan, nganutin uger-uger sane karajegang antuk guru Wisesa

**Palet 4**

**Indik Santana**

**Pawos 45**

1. Sajroning Desa Adat Buitan, ngarajegang pidabdab Santana kapurusa siddhikara tunggil, paperasan, tunggil dadya
2. Sang sapasira ugi sinalih tunggil krama Desa Adat Buitan, meras Santana, nuduk mantu, makedihang utawi nyerahang raga, yogya sangkaning radin, tunggil siddhikara, tunggil dadya, saha polih palugrahan saking Guru Wisesa
3. Indik meras sentana, nuduk mantu, nyukserahang raga, yogya nganggen upacara, manut sastra agama Hindu, sakabwatan swang, sinaksenan dening Prajuru Desa Adat Buitan tur kadamyakang ring paruman desa kadulurin antuk likita pamikukuh saking Guru Wisesa



**Palet 5**

**Indik Wawarisan**

**Pawos 46**

1. Lwir sane wenang kawarisin :
  - ha. Hamong-hamongan ring desa, ayah-ayahan saurah-arih
  - na. Hutang piutang sang kawarisin
  - ca. Saraja druwe, brana, tegal, carik, tatamiyan, sakancan kasugihan.
  - ra. Sangkaning polih pitemes antuk sang kawarisin sang madruwe salwir sane dados kawarisang, pinih akeh apahtigayan saking padruweyan nyane maka piolah-olah pagunakayan, saha kadulurin lekita pamikukuh saking Guru Wisesa.
2. Sane wenang ngawarisin :
  - ha. Manut lalintih paprenahan adoh tampek saking purusa tunggil siddhikara tunggil dadya
  - na. Putra dadaman utawi putra paperasan
  - ca. Mantu kadudukan, minakadi santana saking nuduk mantu
3. Sang sapisira ugi krama Desa Adat Buitan, yan tilar saking agama Hindu tan yogya ngawaris sane kamulan patut warisin
4. Ngedum wawarisan, kapatut sasampun puput upacara pitra yadnya sang ngawarisang bhrana kalih kasugihan punika, pinih sor sasampun mahabenang. Sane dados dum, sajaba sane mangge padagingan pangaci-aci, minakadi salwiring sane mangge piranti ngalaksanayang upacara Agama, pustaka-pustaka sane kapingitang salwir ipun.
5. Sang sapisira krama Desa Adat Buitan sane camput wenang kacamput antuk desa saha kaupacarain sapuputa antuk desa

## **SAPTAMAS SARGAH**

### **WICARA LAN PAMIDANDA**

#### **Palet 1**

##### **Indik Wicara**

##### **Pawos 47**

1. Salwiring wicara indik Adat, ring wawidangan Desa Adat Buitan, wenang rinawosan antuk Prajuru Desa. Yan tan kasiddhan puput; Prajuru Desa ngaturang ring Guru Wisesa buwat matatimbang
2. Yan wenten wicara indik Adat ring banjar, pamaksan, subak, minakadi sekaa-sekaa sewosan, yogya kabawosan antuk prajurunya sowang, yan tan kasidhan, wenang katengahang ka Desa, Prajuru Desa yogya mamawosin
3. Yan pamutus wicara sane katiwakang antuk prajuru Desa Adat Buitan, tan katinutin utawi tan kahiring antuk sang mawicara, wenang sang mawicara nunasang pangrawos ring Guru Wisesa
4. Yan sang mawicara taler tan tinut ring pamutus wicara sane katiwakang hinucap ring hajeng, prasiddha sang mawicara tan polih panyanggran desa, minakadi, tan dados nganggen sapatruweyan Desa, kaheladang utawi kanorayang saking Desa kantos puput wicaranya.

#### **Palet 2**

##### **Indik Pamidandha**

##### **Pawos 48**

1. Lwiring pamidandha sane wenang katiwakang antuk Prajuru Desa, banjar Adat, subak, pamaksan, sekaa-sekaa sewosan, sawawengkon Desa Adat Buitan sakadi ring sor puniki :
  - ha. Dandha artha
  - na. Dandha ayah-ayahan
  - ca. Upasaksi, Dewa saksi, pangrarata, sumpah,
  - ra. Danda panyangaskara, lwire : mrayascita, marisuddha
  - ka. Kasepekang, kaheladang lan kanorayang saking krama desa
  - da. Pamidandha sewosan manut palugrahan Guru Wisesa

2. Patiwak pamidandha, manut hunggwan wicarane sowang-sowang, minakadi werat ringan wicarane hinucap lwire :
  - ha. Yan wicara ring desa Adat, yogya kapidandha antuk Desa. Mungging dadandhan mantuk ka Desa.
  - na. Yan wicara ring Banjar Adat, katiwakin pamidandha ring banjar ika, dadandhan mantuk ka banjar
  - ca. Yan wicara ring subak, ring pamaksan minakadi ring sekaa-sekaa sewosan, katiwakin pamidandha ring kuwu tempeknya sowang. Mungging dadandhan mantuk kasajroning kuwu tempeknya
3. Agung alit dandha, manut panglokikan agung alit werat ringan kasisipane, sane mungguh ring awig-awig gagadhuhanja sowang, minakadi paswara pinaka pamutus paruman

## **ASTAMAS SARGAH**

### **NGUWAH-NGUWUHIN AWIG-AWIG**

#### **Pawos 49**

1. Sane wenang nguwah-nguwuhin inggih punika, pasukretan, paswara, pararem, wiyadin pamutus paruman miwah sane sewosan sapanunggilan ipun
2. Indik nguwah-nguwuhin pasukretan, paswara, pararem, wiyadin pamutus Paruman miwah sane sewosan manut tata kramaning Paruman.
3. Indik nguwah-nguwuhin Awig-awig, manut tata kramaning Paruman, sasampun nunas tatimbang ring Guru Wisesa kalih polih palugrahan sang amawa rat.

## NAWAMAS SARGAH

### P A M U P U T

#### Pawos 50

1. Awig-awig puniki mawasta : “ Awig Awig Desa Adat Buitan ”.
2. Awig-awig puniki pinaka bantang sahananing awig-awig, paswara, pasukretan, miwah salwir ipun, sane mangge ring sowang-sowang Banjar Adat, pura, subak, sekaa-sekaa sane wenten sajroning Desa Adat Buitan
3. Banjar, subak, sekaa-sekaa sane wenten sajroning Desa Adat Buitan wenang ngawangunang awig-awig, pasukretan, paswara, gagaduhan, sowang-sowang, nanging daging ipun tan yogya singsal tungkas ring Awig-awig Desa Adat Buitan
4. Salwiring sane durung mungguh ring Awig-awig puniki, kaungguhang sajroning paswara, pamutus paruman Desa Adat Buitan
5. Dresta kuna sane kari dados angge, yan tan tungkas ring daging awig-awig Desa Buitan manut kojaring sastra agama Hindu, hanut ring Uger-uger nagara, saha kaputusan sajroning Paruman Desa Adat Buitan
6. Awig-awig Desa Adat Buitan puniki sampun kasuratang tur sampun kalaksanayang ring Desa Adat Buitan duk paruman ring rahina Buda Kliwon wara Pahang, pinanggal ping 14, sasih Kenem icaka 1897, tanggal masehi 17 Desember 1975.
7. Awig-awig Desa Adat Buitan puniki kasuratang tur kasampurnayang malih, taler sampun kasobyahang ring krama desa duk paruman desa rahina Anggara Kliwon wuku Dukut, pinanggal ping 6, sasih Kaulu icaka 1942, tanggal masehi 19 Januari 2021.
8. Awig-awig puniki kalaksanayang ngawit dina kasobyahang kantos salantur ipun.
9. Awig-awig puniki kalingga tanganin antuk Prajuru Desa, Kerta Desa, Sabha Desa, saha kasarengin antuk Klihang Banjar Adat Buitan lan Klihang Banjar Adat Pancingan.

10. Lwir sang ngalingga tanganin :

Prajuru Desa Adat Buitan

Bendesa,

Petajuh Bendesa

**(I Nyoman Tjandra)**

**(I Made Puri Suastika)**

Panyarikan,

Juru Raksa

**(I Nyoman Merta)**

**(I Wayan Miasa)**

Sabha Desa Adat Buitan  
Manggala

Kretta Desa Adat Buitan  
Manggala

**(I Wayan Sudarma)**

**(I Wayan Warsa)**

Banjar Adat Buitan  
Klihang

Banjar Adat Pancingan  
Klihang

**(I Ketut Narsa)**

**(I Ketut Mastra)**





